



21. juli 2020

UKA2020/128

Inatsisartut suleriaasianni § 33 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara:

Meeqqat, inuusuttut inersimasullu akornanni naqinnernik ilisarinnissinnaanngitsut aamma atuarnermik allannermillu ajornartorsiuteqartut pillugit nuna tamakkerlugu iliuusissamik pilersaarusiornissamut Naalackersuisut peqquneqarnissaannik Inatsisartut aalajangiiffigisassattut siunnersuut.

(Inatsisartunut Ilaasortaq Sofia Geisler, Inuit Ataqatigiit)

Tunngavilersuut:

2011-ip ukiaani Naalackersuisut Inatsisartunit peqquneqarput nuna tamakkerlugu iliuusissamik pilersaarusiornissamut. Inuppasuarnut pitsaasumik sunniuteqartussamik siunertalik suliaq 2014-imi unitsinneqarpoq.

Nuna tamaat isigalugu pilersaarusiortoqanngitsoorneratigut inuppasuit ajoraluartumik kalluarneqarsimassapput. Inuussutissarsiutigisinnaasunngorlugu piginnaasaqarlerluni ilinniartitaanernut ap-pakaannissamut aporfissaqarsimassapput, sulilumi taamaassalluni.

Ulloq manna tikillugu nalunaarsorneqanngilaq naqinnernik ilisarinnissinnaanngitsut Nunatsinni qassiunerat¹, meeqqanut naqinnernik ilisarinnissinnaanngitsutut pasitsaanneqartunut misiliutaa-sartussaq sulii pigineqarani aammalu naqinnernik ilisarinnissinnaannginnermut misiliutaasartussaq kalaallisut ingerlanneqarsinnaasoq qanorlu annertutigisumik naqinnernik ilisarinnissinnaannginnerup nalilernissaanut atugassiaq sulii pigineqarani.² Inuit Ataqatigiinniit isumaqarpugut meeqqat, inuusuttut inersimasullu eqqarsaatigalugit, siusinnaarluni ikiorsiinissaq iliuuseqarfigisariaqaripput.

Inuit naqinninnernik ilisarinnissinnaanngitsut piginnaasamik millisarneqarnerannik ataavartumik atugaqartarput, naqinnerit nipillugu atuarniarnerminni, naqinnernik ataasiakkaarnerminni allanniarnerminnilu ataqatigiissikkuminaatsittartamatigut.

Naqinnernik ilisarinnissinnaannginneq pissutigalugu ikiorserneqarnissamik pisariaqartitsineq inummiit inummut assigiinngittarpoq, ilisarinnissinnaannginneq assigiinngitsumik sakkortususeqartarmat. Taamaattumik pingaaruteqarpoq naqinnernik ilisarinnissinnaannginneq pillugu inun-nut ataasiakkaanut tunngatillugu tamatuma nalilersorluarneqartarnissaa, ikiorsineq eqqortoq si-usinaartumillu pisariaqartoq anguniarlugu.

¹ §37 naapertorlugu Naalackersuisunut apeqqu nr. 259, 2018

² <https://sermitsiaq.ag/kl/ane-lone-baggernaqinnernik-ilisarinnissinnaanngitsunut-misiliut-suliarineqarpoq>

Periusissiap nuna tamakkerlugu isiginnittup suliarineratigut inuiaqatigiinni akuusut ikittuunngitsut pitsaanerusumik tunngavissinneqarnissaannut aqutissiuussissaagut, inuuniarnikkut atugassarisat pitsaanerulernissaannut tunngavisseeqataassalluta inuillu kiffaangissuseqarnerunermik misigisimalernissaannik pilersitseqataassalluta. Taamaamat Inuit Ataqaqatigiinniit isumaqarpugut nuna tamakkerlugu isiginnittumik periusissiorinissaq pingaaruteqaqisoq pisariaqartinneqaqisorlu.

Qularutissanngilaq inunntut ataasiakkaanut inuiaqatigiinnullumi tamanut pingaaruteqartorujussuummat kikkulluunniit inuussutissarsiutigisinnaasaminnik ilinniakkamik angusaqarsinnaanerat. Tamatumunnga pisariaqartipparput innuttaasut atuarniarnikkut ajornartorsiuteqartut eqqortumik ikiorserneqarnissaat, taamaasillutik ilinniakkamik ingerlatsillutik naammassinnissinnaalernissaat anguniarlugu. Pingaarnertullu; inuiaqatigiinni allat assigalugit paasissutissanut piusunut pissarsinisaminntut appakaassinnaalernermik misigisimalissallutik.

Innuttaasut atuarniarnikkut aamma allanniarnikkut ajornartorsiuteqartut ikiorserneqarnermikkut nukittunerulerpata amerlanerit soraarummeersinnaanngussapput ilinniaqqissinnaalerlutik, kingunerissavaalu kalaallit sulii amerlanerusut sulisinnaanngornerat.

Pisortanut aningaasatigut allaffissornikkullu kingunerisassai:

Siunnersuut pisortanut aningaasatigut allaffissornikkullu malitseqassaaq.

Taggipparput iliuusissanut pilersaarutit piviusunngortinnissaanut ilinniagartuut aappaa avillugu sulisinneqarsinnaasut 500.000 kronit nalinganut. Aningaasat takku Ilinniartitaanermut, Kultureqanermut Ilageeqanermullu Naalakkersuisoqarfimmut illikartinneqassapput, aningaasaliinertulli isigisari-aqarput, tassami iliuusissatut pilersaarusiernerup malitsigisaanik allannermik atuarsinnaanermillu ajornartorsiuteqartut siunissami ikilinerisigut sulisinnaasullu amerlinerisigut inuiaqatigiinnut iluaqutissannngortitsineq anguneqassammat.

Namminersortunut aningaasatigut allaffissornikkullu kingunerisassai:

Siunnersuutit namminersorlutik inuussutissarsiortunut aningaasatigut allaffissornikkullu kinguneqarnissaa naatsorsuutigineqanngilaq.

Innuttaasunut aningaasatigut allaffissornikkullu kingunerisassai:

Siunnersuut nalinnaasumik innuttaasunut aningaasatigut allaffissornikkullu akorngusiinaviangilaq, innuttaasulli atuarnermut ajornartorsiuteqartut imaluunniit naqinnernik takunnissinnaanngitsut naatsorsuutigisinnaalissavaat tunngaviusumik iliuusissanut pilersaarut, siunissami ikiuinissamut tunngaviulluartusaaq. Ikiunissap pineqartup innuttaasut eqqartorneqartut aningaasarsiornikkut atugarissaarnerulersissavai, piginnaasatik nutaat atorlugit soraarummeersinnaalersussaammata ilinniaqqinnissaannut tunngavissiiisumik.